

Para e Djòdjòmentu!

Desde 1981, tempu ku AIDS a aparesé riba e pantaya mundial, tur klase di grupo i organisashon ta purba kombatié: organisashonnan médiko, sientífiko, polítiko, sosial, komersial, èts. Ketu bai, nan tur—kasi sin eksepsyon—ta kanta e méson kansion, “Kondon t’è solushon! Kondon t’è solushon!”

Apesar di tur e fiestamentu i djòdjòmentu ku e piesa ei, AIDS a sigui krese na un forma alarmante. Apesar di tur e kondon nan a parti, awor un situashon epidémiko ta eksistí—**un epidemia ku por a wòrdu prevení!** Miones di hende ya kaba a fayesé. Miones mas a kontagiá e enfermedat.

A yega asina leu ku AIDS ta afektá polítika i ekonomia di hopi nashon afrikano. Industria, komersio, ekonomianan afrikano ta sufri pa falta di obrero. Ku frekuensia por topa mucha di apenas ocho òf nuebe aña ku ta mama òf tata pa nan rumannan mas chikitu—pasobra nan mayornan i faminan a muri di AIDS. I e epidemia ta sigui krese.

Kualke persona ku dos plaka di sintí por komprené ku **kondon NO t’è solushon!** En realidat, **kondon mes ta un parti grandi di e problema.** Ma mayoria hende simpelmente no KE tende ni komprené esei. Otronan ta sigui siegamente nan tras. Poko tin e wesu di lomba pa rechasá kondon komo e solushon!

Siman pasá, gobièrnu merikano a tuma akshon ku ta di aploudí! Inisiá pa presidente George Bush, kongreso di Merka a aprobá ayudo pa batayá AIDS na 13 pais afrikano i dos nashon karibense: Haiti i Guyana. E suma primintí ta \$15 bion durante un periodo di sinku aña!

Sinkuent’i sinku porshento di e pakete finansiero ta pa prevenshon i tratamentu di esnan ku ta infektá. Un parti tambe ta designá pa kuido di esnan ku ta muriendo di e enfermedat i pa muchanan ku a keda huerfano komo resultado di AIDS.

Ma loke ta mas remarkabel di e donashon ta e stipulashon ku **33 porshento di e plaka mester bai pa programanan ku ta siña ku apstenensia te matrimonio ta e solushon!** Ta parse ku porfin, esnan responsabel ta kuminsá lamta fo’i soño i realisá ku **apstenensia te matrimonio ta e ÚNIKO solushon pa AIDS.**

Merka no ta e promé nashon pa tuma e paso inpopolar aki. Na 1995, e pais afrikano Uganda a introdusí e plan “ABC” (na ingles). A – apstinensia promé; B – “be faithful” (sea fiel den matrimonio); C – “condom” solamente komo último rekursu (Prostitutanan so ta haña kondon.) Usando e plan aki, gobièrnu di Uganda a logra redusí e infekshonnan di HIV for di 21% pa 6%! **Ningun pais ku ta sigui e filosofia fatal di kondon a mira un redukshon asina.** Otro nashon ta tuma nota i ta kuminsá sigui e ehèmpel di Uganda.

Ta tempu pa nos islanan tambe lamta fo’í soño. Si nos ta sigui balia riba e piesa “Kondon t’è solushon!”—manera nos ta hasi ketu bai mientras **nos paisanonan ta muri di e AIDS—e epidemia lo sigui krese.** Ma si nos aseptá e plan di nos Kreador i posponé tur relashon seksual te matrimonio anto keda fiel na nos kasá, **SIN DUDA** nos lo mira un redukshon di AIDS...i tur e otro enfermedatnan transmití seksualmente!

Puresa seksual semper ta bentahoso tantu pa e persona, e pareha, komo e komunidad. Ta pasobra Dios ke nos bon, El a bisa, “*Laga matrimonio wòrdu onrá pa tur hende, i laga e kama matrimonial ta sin mancha; pasobra Dios lo huzga fornikadónan i adúlteronan*” (Hebreonan 13:4). No ta pornada Beibel ta bisa, “*Hui for di inmoralidat...*” (1 Korintionan 6:18).

Ta tempu pa nos para nos djòdjòmentu tokando e piesa, “Kondon t’è solushon!”...mientras nos ta sigui dera víktimanan di un epidemia ku nos mes ta permití pa kontinuá. **Ta tempu pa nos tin wesu di lomba i para firme pa e plan di nos Kreador i enkurashá solamente apstenensia te matrimonio!**